

Vinars ai 27 di Mai, aes 6 sore sere inte sale dal Consei Comunâl a Felet al vignarà presentât il gnûf libri di **Giannino Angeli**, "Vive Udin! Vive l'Italie!".

La serade e je organiza-de de Societât Filologjiche Furlane, dal Comun di Tavagnâ e dal Circul Culturâl "Settetorri per il Terzo Millennio", cu la poie de Fondazione Crup, dentri dal program uficiâl des iniziative in memorie dal Centenari de Prime Vuere mondiâl par cure de Presidence dal Consei dai ministris - Strutture di Mission pai aniversaris di interès nazionâl.



Il municipi di Tavagnâ a Felet

Il gnûf libri di **Giannino Angeli** 'Vive Udin! Vive l'Italie' al vignarà presentât te sale dal Consei comunâl di Tavagnâ.

MISURÂT AMÔR DI PATRIE

Il lavôr, intal quadri di un misurât e sclet amôr di Patrie, si presente come une autentiche rivelazion dai aspjets sociologjics, no dome locâi, che a rivuardin la Prime vuere mondiâl in Friûl, là che la vuere e puartà ae division des fameis e ae ocupazion dal teritori di bande dal nemî. La situazion particolâr che lis popolazions a àn vivude in chei moments e ven ricostruide e animade a traviers de corispondence jenfri lis personis di une grande famee di Felet, separadis par vie de Vuere: un pôcs restâts in Patrie e un pôcs sfolâts a Florence. E nas cussì une storie che e cjape dentri dute la int dal lûc e nus mostre un

Vuere contade des fameis

timp tribulât par vie de fame e des difcoltâts inte comunicazion, une realtât teribile se le cjaln cui voi di vuê. La narazion e fâs vignî fûr ancje figuris aromai sparidis inte nestre zone: lis variis fameis Feruglio cui lôr sorenons, la organizazion amministrative, lis condizions sociâls e economicis.

LA TRAME

La trame jenfri fats locâi, contest gjenerâl, organiza-

zion dai sfolâts, presence des Prefeturis e dai Comuns - daurman ricostituïts te Italie libare - a fasin di speli ai events che a àn segnât di brut lis nestris comunitâts e che chest libri al pant par memoreâ la storie dal Comun di Tavagnâ.

Dopo de introduzion dal professôr **Fulvio Salimbeni**, si darà vôs a dialics e imagjins. Al moderarà l'incuintri **Feliciano Medeot**.



redazione@ifriuli.it

ZORNADE DAL ZÛC

Societât di archeologie su lis olmis dai antics

La Societât Furlane di Archeologie (Sfa), in ocasion de Zornade mondiâl dal zûc, e organize un event speciâl dedicât al zûc e ai zugatui te antichitât. E sarà cheste la ocasion di cognossi i passetims dai nestris antenâts e di provâ a zuiâ come lôr, tornant indaûr tal timp.

L'apontament al è par vinars ai 27 di Mai aes 5 dopomisdî li dal tor di Puarte Vilalte a Udin. **Chiara Zanforlini** de Universitât di Turin e fevelarà dai zugatui egjizis, presentant cemût che si divertivin i fruts al timp dai faraons e fasint viodi cemût che lis cundizions climaticis a àn permetût la conservazion di una vore di reperts. **Alessandra Gargiulo** de Sfa e presenterà i zûcs dai fruts dai antics grêcs e romans: cu la sô reazion e fasarà viodi cemût che tancj zugatui di vuê a son une vore simii a chel dal passât.

SCOLTADIS DI DRIUS

Miôr di une gorne

Ultime aluvion a Martignâ. Marie a Jacum: "Se les nestris gornis e glotessin tant di te no varessin vude l'aghe te cantine."



E torne su Rai3 XtremeTV

GRANT INTERÈS. Dopo un prin passaç su Rai3 Fvj, intal 2015, viodût l'interès dismovût, cumò la Rai e à decidût di tornâ a programâ la serie +sKlet/XtremeTV, tacant di domenie ai 29 di mai (aes 10.40 plui o mancul). Chês altris 4 pontadis a saran mandadis intes domeniis dopo: 5, 12, 19 e ai 26 di Jugn, simpri ae stesse ore. Par cui che al ves di pierdilis, e je la pussibilitât di riviodi lis imagjins spettacolârs sul cjanâl 103 (Rai3 bis), ducj i miercus di jugn (1, 8, 15, 22, 29), aes 21.50. +sKlet/XtremeTV: e je une serie televi-



sive, in 5 pontadis di 18 minûts ognidune, prodote di Informazion Furlane cu la poie de ARLeF (Agjenzie Regjonâl pe

Lenghe Furlane) che e ufris al public une escursion fra lis ativitâts sportivis plui originjâls che si fasin in lûcs naturalistics particolârs dal Friûl.

Des cimis de Cjargne ae lagune di Grau e Maran, une ocasion par scuvierzi un microcosmi inspietât e sorprendent, fat di personis, lûcs e carateristicis che a fasin speciâl cheste region. Une produzion a bas cost cuntune dotazion lizere e une troupe di 5 personis, coordinade dal regist operator **Giorgio Cantoni**, ma cun risultâts emozionai e promozionai tant interessants. A son stâts sielzûts lûcs impegnats te valorizazion de produzion locâl, in sintonie cu la culture de aree di apartignince.